

# 申報

## 閱申報論臺灣事

海上寓公稿

前聞東洋征討臺灣生番，亦曾論及此事。昨閱香港中外新聞，又將此事列入報中，頃又接福建官場來函，備述此舉以爲東洋入大島荒謬，夫臺灣，我朝版輿之地也，且生番，又屬其地化外之民也，故生番之不誦王化，不勝懲治，吾人而知之，不但東洋數人，貿貿然往彼，自取其禍，即華人，有誤入其境者，雖盈千累萬，彼亦可生噬而不恤也，所怪東洋人與彼接壤，豈有不知其地乎？乃竟自投羅網，致彼逞烹食之常，此皆東洋之自不知機，實是生番之素行常度也，乃今東洋人不知輕重緩急，不守法度規矩，遽爾興師征討，以爲報仇雪恨之計，豈知已視我朝，有玩於股掌之勢，所以然者，誠以臺灣爲中國所隸之版圖，而生番又爲中國化外之頑民耳，若因頑民而逞志報讐，則其地之良民，亦連累而遭劫，有是理乎？此臺灣之人，所爲痛心而疾首，而閩省之民，又爲拊膺而扼腕者也，然則東洋人果可操必勝之權乎？恐未必能也，因有主客之分也，更有衆寡之別也，又有勞逸之判也，且有負隅之固也，況其地富饒甲於各口，強橫獨出此鄉，不啻豺狼，真如虎豹，果其奮力，大賄憑陵，正所謂百夫決拾，萬人莫當也，此是後言，姑弗具論，第由今觀之，則東洋之蔑視我朝之人，已可概見，雖曰前有允其報復之請，此亦中華萬不得已之衷懷，亦未有准其興萬五千大兵之意，不過爲以暴易暴，以強攻強之思耳，然其中良莠不齊，賢愚不等，倘爲此無人性之頑民，而彼及守禮信之良民，豈得爲仁義之師，堂堂之舉乎？或曰：此東洋人或因利而行之，而藉此興兵，以窺伺中華邊徼之地耳，果如是言，則東洋之處心積慮，已非一日矣，而故令一二敢死之士，故入生番地，以尋此費端，可圖此舉，以借報仇之名耳，是將有不可問之心矣，因先論及之，以俟後來之情形，果有當於斯言否？